

## القنفذ الكذاب حدوتة بالعامية المصرية

حبايبي الحلوين

وكان يا مكان وبقولكوا: كان فيه قنفذ وكان يقعد مقنفذ كده، يلم شعره ويقعد ساكت، ولما يجوع كان يمشي ويروح يدور على أكله، ولما يعطش كان يمشي ويروح يدور على مِيْتِه. ولما يأكل ولما يشرب يقعد مقنفذ يلف راسه عشان يشوف ويلف راسه عشان يسمع، وان شاف يخاف وإن سمع بردو يخاف، واول ما يخاف يفرد شعره، شعر القنفذ طويل ولما ينفرد يقف، ولما يقف شعر القنفذ بيبقي زي الشوك، لو ديب جه ياكله ميعرفش، شوك القنفذ يشكشك الديب ميعرفش ياكله، لو التعلب جه ياكله شوك القنفذ يشكشك التعلب ميعرفش ياكله، أدينا عرفنا أهو لما القنفذ يخاف بيغرد شعره، وشعره لما بينفرد بيبقي شوك حامي لا تعلب يعرف يعضه ولا ديب.

القنفذ قاعد مقنفذ أهو، وبص بعينه شاف ايه؟

تعلب؟ لاء، ديب؟ برده لاء، بيبقي خلاص بلاش يفرد شعره، لكن يمشي ويروح يشوف ايه دول، دول أرانب صغيرين.

أرنب ينط يجيب الأكل واخواته الأرانب ياكلوا، أرنب ينط يجيب الميه واخواته الأرانب يشربوا وفي الآخر يلعبوا.

قنفذ المقنفذ يقول: والله دي عيشه حلوة انا لو كنت أرنب يااااه كنت آكل وكنت أشرب وكنت أنام وادفي، لكن يا خسارة مانيش أرنب.

قنفذ المقنفذ يقول: الله وإيه يعنى هو لازم يعنى أكون أرنب وإيه يعنى، طب ما أنا أكذب!

أكذب علي الأرانب الصغيرين لو كذبت عليهم هيصدقوني، أكذب عليها كده واضحك عليها كده يحسبوني أرنبه من الأرانب، وآكل واشرب وألعب وأنام وخلص.



وقنفد المقنفد قال: أروح بقي واكذب، أروح بقي وارتاح ما دام الكذب هيخليني أرتاح، ماكدبش ليه بقي، ما دام الكذب هيخليني مبسوط ما اكدبش ليه يعني، أكذب وارتاح وانبسط وخلص، قنفد المقنفد عمل ايه؟ قنفد المقنفد راح فين؟ قنفد المقنفد قال ايه؟

تعرفو تعرفو قنفد المقنفد راح عند الأرناب الصغيرة، وقعد يبوس في الأرناب الصغيرة وكذب علي الأرناب الصغيرة وقال: ايه مش عارفين انا اخوكم الكبير وانتم إخواني كلنا اخوات.

أبويا أرنب وأمي أرنبه أنا أخوكم الكبير شوفتوش بقي.  
(لاء لاء يا قنفد لا ده كلام كذاب)

قنفد المقنفد يقول: وإيه يعني ما دام الكذب هيخليني مبسوط ما اكدبش ليه بقي، ما دام الكذب هيخليني مرتاح ما اكدبش ليه يعني؟  
وأديني كدبت وقلت لهم انا أخوكم الكبير، بس الأرناب تبصله أخونا الكبير، طب ده احنا ديلنا قصير وهو مش باينله ديل! طب ده احنا ودانا طوييلة وهو مش باينله ودان!

يبقي أخونا ازاي بقي؟ أرنب صغير من الأرناب يقول: يعني إيه معقولة أخونا الكبير هيكدب؟ قال إنه هو أخونا الكبير يبقى هو أخونا الكبير والأرناب تبوسه والأرناب تحضنه والأرناب تقوله: انت أخونا الكبير عايرنا نعمل إيه نعملهوك؟  
قنفد المقنفد يضحك في سره ويقول: ضحكت عليهم وكدبت عليهم.  
ويقول: شوخوا بقي، الإخوات الصغيرين يعملوا إيه لأخوهم الكبير؟  
أرنب من الأرناب يقول: أخونا الكبير يمكن جعان يلا نجبله الاكل، ويجيبو الأكل للقنفد والقنفد ياكل.

أرنب من الأرناب يقول: أخونا الكبير يمكن عطشان يلا نجبله ميه، ويجيبو ميه للقنفد والقنفد يشرب.

عايز حاجة ثانية يا أخونا الكبير؟

قنفد المقنفد يضحك في سره ويقول: عايز أنام بقى.

قنفد المقنفد ينام لكن ايه ده ايه ده صوت تعلب ده ولا ديب؟

خاف القنفد وفرد شعره وشعره شوك، شعره شكشك الأرانب.

الأرانب قالوا: يااااه أخونا الكبير شعره طويل خالص ده شعره طويل زي الشوك، لكن

مفيش تعلب ولا ديب، قنفد اطمن ولم شوكة ونام.

الأرانب الصغيرة قالت: يا تري أخونا مبسوط؟

أرنب من الأرانب قال: أخونا الكبير أكيد مبسوط جنباله أكل وأكل، وجبنا له ميه وشرب

ولما قال أنام خليناه ينام، أخونا الكبير أكيد مبسوط، لكن بقى أرنب من الأرانب نط

وقال: ياعيني ياعيني يا حرام أخونا الكبير مش ممكن يكون مبسوط أصل شعره طويل

أوي بقى زي الشوك، أخونا الكبير ياعيني مفيش عنده فلوس عشان يروح عند الحلاق،

أخونا الكبير يا حرام مفيش عنده مقص يقص شعره بيه، أرنب من الأرانب قال: أنا اعرف

اعمل حلاق وأقص له شعره.

والأرنب خلى القنفد المقنفد نايم وقص له شعره، والأرانب قالت: ياااه ده أخونا الكبير

لما يصحي هيفرح أوي كان شعره طويلة وقمينا هولاه.

ويمصي القنفد إفرح بقى لكن يفرح ايه ده كل شعره راح، والقنفد من غير شعر ياكله

التعبان وياكله الديب.

كُذب القنفد كذبه صغيرة فبقى من غير شعر ومن غير شوك، يلا يلا اللي ياكله ياكله

واللي يعضه يعضه، ذنبه على جنبه مين كان قاله يعمل كداب.

وتوتا توتا خلصت الحدوتة يارب تكون حلوة مش ملتوته.

اللي كتب الحدوتة نادر أبو الفتوح.

والحدوة تحكيها أبله فضيلة على هذا الرابط:

<https://soundcloud.com/riham-mahmoud-351637637/rjgdx0mw19qu>

و تصبحوا علي خير